

Շ. Ս. ՄԱՐՏԻՐՈՍՅԱՆ, Արդի էկոլոգիական իրադրությունը և ճաստափակված սխտեմները,
ՀՍՍՀ ԳԱ հրատարակություն, Երևան, 1977, 125 էջ:

Շրջապատող միջավայրի պահպանությունը և բնական ռեսուրսների ռացիոնալ օգտագործումը գիտատեխնիկական հեղափոխության պայմաններում ձեռք են բերել առաջնահերթ նշանակություն: Այդ հրատապ պրոբլեմների նկատմամբ կուսակցության հոգատարությունն արտացոլվել է նրա Մրազրում, ՍՄԿԿ XXIV և XXV համագումարների որոշումներում, ինչպես նաև ՍՍՀՄ նոր սահմանադրության մեջ, որտեղ ասված է. «Ելնելով ներկա և ապագա սերունդների շահերից, ՍՍՀՄ-ում անհրաժեշտ միջոցներ են ձեռնարկվում հողի ու նրա ընդերքի, ջրային ռեսուրսների, բուսական և կենդանական աշխարհի պահպանման և գիտականորեն հիմնավորված, ռացիոնալ օգտագործման համար, օդի և ջրի մաքրության պահպանման, բնական հանքային ռեսուրսների վերարտադրության ապահովման և մարդու շրջակա միջավայրի բարելավման համար» (հոդված 18): Ուստի միանգամայն բնական է, որ արդի էկոլոգիական իրադրության պատճառների և հետևանքների ուսումնասիրությունը դարձել է մարքս-լենինյան փիլիսոփայության առջև կանգնած գլխավոր խնդիրներից մեկը:

Վերջին տարիներս մեր երկրում էկոլոգիական պրոբլեմատիկան ուսումնասիրվում է ամենատարբեր տեսանկյուններով: Սակայն նրա սոցիալ-փիլիսոփայական տեսանկյունը, ներառյալ արդի էկոլոգիական իրադրության ծագումը, որպես մարդու վերափոխելի գործունեության հետևանք, անբավարար է ուսումնասիրված: Այդ իսկ պատճառով ուշագրավ է Շ. Մարտիրոսյանի «Արդի էկոլոգիական իրադրությունը և հասարակական սխտեմները» աշխատությունը, որտեղ էկոլոգիական իրադրությունը քննվում է բնական միջավայրի վերափոխման ուղղված մարդկային գործունեության ընդլայնման և խորացման պատմական միտումների վերլուծության հիման վրա: Մարդու վերափոխելի գործունեության խորացումը բնական միջավայրի համապարփակ ապահովման պրոբլեմի առաջացման տեխնոլոգիական հիմքն է: Այդ գործունեության ընդլայնումն իր հերթին առաջ է բերում բնական միջավայրում, երկրի կենսոլորտում էկոլոգիական հավասարակշռության խախտում: Գրախոսվող գրքում ուսումնասիրված է նաև բնական ռեսուրսների պրոբլեմը: Հեղինակի մեկնաբանությամբ, վերջինս ծագում է այն ժամանակ, երբ մարդու և հասարակության աճող պահանջմունքների բավարարման պատճառով առաջանում է բնական հարստությունների սպառման իրական վտանգ: Մյուս կողմից, բնական ռեսուրսների սպառում տեղի է ունենում դրանց ոչ ռացիոնալ օգտագործման հետևանքով:

էկոլոգիական պրոբլեմների ծագման ու լուծման մեջ արդի գիտատեխնիկական հեղափոխության տեղի և դերի պարզումը ունի ոչ միայն տեսական, այլև գործնական խոշոր նշանակություն: Հեղինակն իրավացի է, պնդելով, որ գիտատեխնիկական հեղափոխությունը ոչ այնքան առաջացնում է բացասական էկոլոգիական հետևանքներ, որքան նպաստում է բնության պահպանման պրոբլեմների կոմպլեքսային լուծմանը: Այդ կապակցությամբ Շ. Մարտիրոսյանը նշում է, որ միայն ժամանակակից գիտատեխնիկական նվաճումների հիման վրա է հնարավոր էկոլոգիական պրոբլեմի լուծման տեխնոլոգիական նախադրյալների ստեղծումը: Աշխատության մեջ բերված տվյալները ցույց են տալիս, թե գիտատեխնիկական նվաճումները ինչպես են նպաստում մարդկային գործունեության բացասական հետևանքների կանխմանը:

Հասարակության զարգացման արդի փուլում սոցիալ-էկոլոգիական բնույթ են ստանում նաև մարդու՝ շրջապատող միջավայրի վերափոխման ուղղված գործունեության կողմնակի և միջնորդավորված հետևանքները: Ուստի, միանգամայն օրինալափ է մարդու գործունեության զնահատման համակարգի փոփոխման մասին հեղինակի հարցադրումը: Ընդ որում, նրա եզրակացությունն այն է, որ այժմ գործունեության զնահատման համար բավական չէ հիմնվել միայն նպատակահարմարության սկզբունքի վրա, այսինքն՝ ելնել անմիջական, ցանկալի արդյունքների ապահովման պահանջներից: Մարդու նպատակների իրականացմամբ պայմանավորված բա-

ցասական հետևանքները ևս պետք է ներառվեն կոնկրետ գործունեության գնահատման համակարգի մեջ:

Վերլուծելով արդի էկոլոգիական իրադրության սոցիալ-տնտեսական տեսանկյունները, Շ. Մարտիրոսյանը ցույց է տալիս էկոլոգիական խնդիրների լուծման մեջ զարգացած սոցիալիզմի առավելությունները կապիտալիզմի նկատմամբ և թվարկում է դրանք: Գրանցից կարելի է տեսնել, որ արտադրության միջոցների հանրային սեփականությունն է, որը թույլ է տալիս ապահովել հասարակական շահերի առաջնությունն անձնականի նկատմամբ:

Գրախոսվող գրքի արժանիքներից է և այն, որ հեղինակը ոչ միայն ընդգծում է այդ դրույթը, այլև առանձնացնում է զարգացած սոցիալիզմի կոնկրետ առավելությունները, որոնք տարբեր բնագավառներում վերջին հաշվով ապահովում են հասարակական շահի առաջնությունն անձնականի հանդեպ: Հեղինակը այդ առավելությունների շարքում է դասում ժողովրդական անասնության պլանավորումը, բնության պահպանության սոցիալիստական օրենսդրությունը, նոր արդու էկոլոգիական դաստիարակությունը, սոցիալիստական ինտեգրացիան և այլն:

Ուշագրավ է այն, որ հեղինակը սոցիալիզմի կոնկրետ առավելությունների շարքում ներառնում է նաև սոցիալիստական ինտեգրացիան, որի շրջանակներում Տնտեսական փոխօգնության խորհրդի անդամ երկրների պլանային համագործակցությունը նաև էկոլոգիական համագործակցության հիմքն է: Դա կապիտալիզմի հանդեպ սոցիալիզմի առավելությունների ապացույցն է միջպետական մակարդակում:

Գրքում Սովետական Հայաստանի օրինակով ցույց է տրված, թե ինչպես է կենսագործվում ՄԱԿ-ի XXV համագումարի մշակած էկոլոգիական քաղաքականությունը: Մեծ ուշադրություն է դարձվում Սևանի պահպանության պրոբլեմին: Ընդ որում, առաջ են քաշված լճի էկոլոգիական միջավայրի պահպանման և վերարտադրության հարցերի կոմպլեքսային լուծմանն ուղղված առաջարկություններ:

Աշխատությունն ավարտվում է կապիտալիստական արտադրանքների և էկոլոգիական պրոբլեմատիկայի փոխհարաբերության վերլուծությամբ: Հեղինակի եզրակացությունն այն է, որ սոցիալ-տնտեսական տեսանկյունից իր դարն ապրած կապիտալիզմն իրեն սպառել է նաև էկոլոգիական տեսանկյունից: Նույնիսկ բուրժուական գիտնականներն ստիպված են ընդունել բնական միջավայրի ապականման սոցիալական բնույթը, մի ապականում, որը կապիտալիստական երկրներում դարձել է իսկական ազգային ողբերգություն:

էկոլոգիական պրոբլեմատիկայի գաղափարախոսական տեսանկյունների հարցը սովետական սոցիալ-փոխոստիպական գրականության մեջ բավարար է ուսումնասիրված: Այդուհանդերձ, Շ. Մարտիրոսյանը կարողացել է տվյալ պրոբլեմին մոտենալ յուրովի՝ առանձնացնելով և քննելով սոցիալիզմի դեմ կապիտալիզմի շատագուցների ձեռնարկած գաղափարական դիվերսիաների տակտիկական և ստրատեգիական նպատակները: Հեղինակի կարծիքով, այդ դիվերսիաների տակտիկական նպատակն է ապացուցել, թե, իբր, էկոլոգիական պրոբլեմների լուծման ասպարեզում սոցիալիզմը կապիտալիզմի հանդեպ առավելություններ չունի և որ բացասական հետևանքների առաջացման մեջ սոցիալիզմը նույնպես մեղավոր է: Բուրժուազիայի գաղափարախոսական գործունեության ստրատեգիական նպատակն է ցույց տալ, թե, իբր, ժամանակակից կապիտալիզմը հնարավորություն ունի լուծելու ոչ միայն արդիական, այլև պոտենցիալ էկոլոգիական պրոբլեմները: Սակայն, ինչպես ճիշտ նկատել է Շ. Մարտիրոսյանը, կապիտալիզմի շատագուցների բոլոր այդ փորձերը օբյեկտիվորեն դատապարտված են ձախողման, քանի որ միայն սոցիալիզմն է ընդունակ լուծելու էկոլոգիական պրոբլեմները:

Գրախոսվող աշխատությունն իր բոլոր արժանիքներով հանդերձ ունի որոշ թերություններ: Այսպես, օրինակ, նրանում, Հայկական ՍՍՀ օրինակով, ապականումից բնական միջավայրի պահպանման հարցերը սպառել չեն լուսաբանված:

Չնայած նշված և մասնակի այլ թերություններին, Շ. Մարտիրոսյանի աշխատությունը լուրջ գիտական ուսումնասիրություն է: Այն արդի էկոլոգիական իրադրության պրոբլեմների սոցիալ-փոխոստիպական վերլուծությանը նվիրված հայերեն առաջին գիրքն է:

ՌՈՐԵՐՏ ԱՎԱԳՅԱՆ

Իրավաբանական գիտությունների թեկնածու